

Movimaint per tgnair la staziun in cumün

Als 21 avuost vain fundada la Societä «nossa staziun»

La Viafier retica vuol fabricar üna nouva staziun a Lavin dadour cumün. La populaziun da Lavin fa oposiziun e vuol fundar üna societä per trattar culla Viafier retica e cul cumün da Zernez.

NICOLO BASS

Daspö il 1913 exista la staziun da Lavin immez cumün. Dal 2023 aintra in vigur la ledscha federala a regard persunas cun impedimaints (LPI). Quista ledscha pretenda cha persunas cun impedimaints hajan access in tuot ils stabilimaints publics. Quai vaglia eir per la staziun da Lavin. Ün adattamaint da la staziun existenta cuostess tenor la Viafier retica bundant 20 milliuns francs. Perquai examinescha la Viafier retica actualmaing differentas variantas realisablas. Üna da quellas füss da fabricar üna nouva staziun per Lavin dadour cumün i'l territori da Crusch. Per quist proget prevezza la Viafier retica cuosts da 12,5 milliuns francs. Al principi da gün ha infuormà la Viafier retica a la populaziun da Lavin (vaira artichel illa Posta Ladina dals 11 gün). Il plaschair da la populaziun per quista varianta nun es stat grond. Uossa vöglian tscherts iniziants fundar la Societä «nossa staziun» per cumbatter e mantegner la staziun in cumün.

Ün argumaint unic da vendita

Jürg Wirth da Lavin es ün dals iniziants dal movimaint per la staziun existenta da Lavin. «La staziun da Lavin es ün lö fich important per la vita sociala in cumün», disch Wirth cun persvasiun. «La staziun retschaiva ils giasts immez cumün ed in pacs minuts ragiundschan els la piazza da cumün ed ils allogis», cuntinuescha'l. Tenor el han lö differents arrandschamaints a Lavin impustüt eir causa la vicinanza per exaimpel da la sala polivalenta a la staziun. «Scha la staziun vain spostada nu varan quists arrandschamaints ed inscutters plü lö in cumün», disch Wirth, «perquai faja



La Societä «nossa staziun» vuol s'ingasar per mantegner la staziun immez cumün a Lavin. fotografia: Flurin Andry

dabsögn cha nus cumbattain per nossa staziun immez cumün.» Cha finalmaing saja quai bain eir üna posiziun turistica ed ün argumaint unic da reclama pel cumün da Lavin. «Ingüns oters cumüns in Engiadina Bassa nun han la staziun uschè dastrusch al center da cumün», constata'l. Tenor Jürg Wirth prevezza la varianta d'üna nouva staziun dadour cumün üna simpla fermativa cun üna cabina da vaider sainza scharm e character. «Quai nu das-cha bain a esser la nouva porta d'entrada per Lavin», as dumonda'l.

Suottastrichar l'importanza culturala

In dumengia, ils 21 avuost, a las 11.15 varà lö a Lavin, la radunanza da fundaziun da la Societä «nossa staziun». Jürg Wirth sperescha cha plü bleras persunas pussibel vegnan commembras da

la societä e piglian eir part a l'act da fundaziun. A partir da las 12.00 ha lö üna gronda festa pro la staziun. «Nus lain eir muosar la valur culturala da nossa staziun per tuot il cumün», imprometta Wirth. Tenor el dess la societä s'ingasar pel mantegnimaint da la staziun. «Plü blers commembers cha la societä ha e plü ferma cha quella sarà. Ün böt da la societä es da pudair tour part a las trattativas tanter la Viafier retica e'l cumün da Zernez. Jürg Wirth vuol eir trattar cullas organisaziuns per

persunas cun impedimaints per chattar soluziuns per adattar la staziun existenta in möd realistic a las pretaisas da la ledscha. «Tantüna ha la staziun immez cumün eir blers avantags per persunas cun impedimaints», manaja'l. Cha la societä nu pudarà però as participar a la finanziaun da la differenza finanziaun tanter las duos variantas. «Quai nun es nossa lezcha, però nus lain avair pled in chapitel pro las decisiuns finalas per defender ils interess da la populaziun da Lavin.»

Cumposiziuns prontas per registrar

La chantadura Nina Mayer ha plüs progets

Daspö l'on 2005 abita Nina Mayer cun seis hom Marco e lur duos figlias a Ramosch. Per ch'ella possa realisar seis progets vain la chantadura promovüda eir da la Regenza grischuna.

«Ch'eu survegna il premi da promoziun chantunal, quai es stat per mai üna grondschma surpraisa, eu nu sa amo adüna na chi chi ha proponü da'm promover cun quel», disch Nina Mayer-Hoffmann, «il plü grond gust m'haja fat chi m'han dat il premi per mia lavur sco chantadura. Fingü da pitschna laiva imprendere quist manster.» Duos ons ha frequentà Nina Mayer uras da chant classic privatas pro Helena Jungwirth, chantadura da chombra a l'opera München e docenta a las scoulas otas da musica e chant ad Augsburg e Nürnberg. Davo ha ella cumanzà il stüdi da musica cun chant e culs instrumaints clavazin e gĩa. Quel ha ella interruot per avair temp per sia figlia Hannah chi d'eira nada cuort davo la matura. «Uossa n'haja però da muosar ch'eu n'ha eir merità quist premi chi'm dà ün grond stumpel da motivaziun», agiundscha'l. Progets ha la chantadura e musicista plüs.

Scuvrida da Giusep Giuanin Decurtins

Accompagnada da l'accordeonista Sidonia Caviezol da Martina e la clarinetista Maria Pardeller da Strada vaiva chantà Nina Mayer per l'Arch musical



La chantadura Nina Mayer da Ramosch es motivada. fotografia: Flurin Andry

i'l museum Stamparia Strada. «Uschea es nat il contact cul Radio Rumantsch, il redacter Giusep Giuanin Decurtins ans ha fat la proposta da tour sü ün pèr chanzuns sün disc cumpact.» In october esa previs da registrar trais chanzuns cha Nina Mayer ha scrit e cumpunü. Ella es fich infatschendada cul cumpuoner, «forsa daja üna jada eir ün disc inter», chi saja però bler da far fin cha las cumposiziuns sajan prontas. «Eu collavur cun Sidonia, nus vain eir fingü chantà a duos vuschs, nos stil es plütöst musica populara.» Insemel cun Maria Pardeller dirigia ella il cor da Valsot. Las prouvas sun per part a Ramosch e per part a Strada. «Nus ans pudain partir la lavur, tschernin insemel ils temas e tscherchain cumünaivelmaing las chanzuns adattadas. Maria cugnuscha fich bleras chanzuns rumantschas.»

A tadar a discuorrer rumantsch a Nina Mayer nu's bada ingün accent. Listess deriva ella da la Germania. «Eu sun nada a Garmisch-Partenkirchen, meis «Geburtshelfer» d'eira l'abiadi dal

Commentar

I vala la paina da cumbatter

NICOLO BASS

Chi chi paja cumonda! Quai es ün vegl proverbio chi vaglia amo adüna. Per la Viafier retica sarà la differenza da bod ot milliuns francs tanter las duos variantas per la staziun a Lavin ün argumaint fich important. Eir ils fats cha cun üna nouva staziun bundant ün mez kilometer dadour Lavin, as pudessa acmplir plü bain las pretaisas da la ledscha federala a regard persunas cun impedimaints e finalmaing eir corregger la situaziun insuficianta pro l'areal dal Vereina a Sglaia, saran argumaints decisivs. Però l'importanza d'üna staziun immez cumün nu das-cha gnir suotvalütada. Lavin es l'unic cumün in Engiadina Bassa cun üna staziun centralisada immez cumün: Cun pacs pass as ragiundscha la sala polivalenta ed in gnanca duos minuts as riva sülla piazza da cumün e pro differents allogis. La staziun es integrada illa vita da cumün; la staziun es ün lö d'inscutter cun importanza sociala e culturala. Eir pel svilup turistic es üna staziun immez cumün fich importanta. Quai es ün argumaint da vendita per Lavin, ün USP (Unique Selling Proposition) illa regiun chi fa reclama culs mezs publics. Per quistas valuors vala la paina da cumbatter. Cha la populaziun da Lavin fa quai es inclegiantaivel. Plü gronda cha la societä vain e plü ferma cha l'opposiziun sarà. Perquai esa important da guadagnar plü blers commembers pussibel. E lura starà eir la Viafier retica tour cogniziun dal movimaint a Lavin e forsa resguardar ils giavüschs in lur trattativas. Però la societä nu güdarà a finziar ils cuosts implü. Uschè cha la decisiun finala restarà pro quel chi investischa e quai es la Viafier retica.

nico.bass@engadinerpost.ch

Bogn Engiadina

Causa pensiun tscherchaina a partir dals 1. december 2016 ün/-a

Collavuratur/-a 100% pel Bogn Quadras, Sport Trü e Sport Gurlaina

Sias lezchas

- guardgiabogn, servezzan da cliantella (chascha) e lavuors da pulir
- mantegnimaint da la tecnica da trattamaint d'aua
- lavuors da revisiun (tecnica e pulir)
- surtour lecziuns da nodar
- mantegnimaint dals implants externs (lavuors dad üert)
- mantegnimaint dals implants da glatsch

Seis profil

- certificat valabel brevet IGBA Pro opür SLRG Pro Pool (nodar da salvamaint)
- scolaziun valabla BLS/AED
- bun nodader / buna nodadra
- flexibel e pront da lavurar la fin d'eivna e dis da festa
- lavurar independentamaing
- interess tecnic, dun manual, manader/-ra J+S e la scolaziun «impiegà da bogn IGBA» sun d'avantag

Nossa sporta

No spordschain üna lavur interessanta, variada ed independenta in piazza annuala. La paja e las prestaziuns socialas correspuondan a quellas dal cumün da Scuol.

Per ulteriuras infuormaziuns sta gugent a disposiziun sar Mario Duschèn, manader Trü-Quadras-Gurlaina, telefon 081 861 26 29.

L'annunzcha in scrit culla documainta üsitada es d'inoltrar fin als 19 avuost 2016 a:

Center da sandà Engiadina Bassa
Servezzan da personal
Via da l'Ospidal 280
CH-7550 Scuol
Mail: personal@cseb.ch

